

1 Timoti

¹ Aya, Pol, Negur neda Isennadaya ado Kristus Jesus neda wauda iseya neid nigiya od bunem Kristus Jesus nē aposel wō aun,

² Timoti, momoya bun neu kesu bagai, bun pas enei atotof.

Tamada Negur ado neda Odug Kristus Jesus neid wau ifenēya, wau yūya ado, wau inosiya, õ bun ibodōf.

Idegēya Lo Tai Fiya Tamo Nigin Weder Irouya

³ Aya Masedonia provins alauf sain bun, aya õ totol bagai arokonom, Efesus an ubod ken, tamo tunī urokenēdi di, idegēya keleī anī baban to tai difediyouf.

⁴ Ago di, idi nenerī ege ado ibor idikeleya sā dir difedidig anī so difediyouf. Age fediya are momoya bunem Negur nē kabī yaleya ban, luwa irouya dogol dalesedig.

⁵ Weder irouya od enei nē gariya are, wau laa fiya, are ī wau karētut, es fiya kisi biya ado, momoya bagai bun tamal isidig.

⁶ Tunī enei bunem diya dile, od kaū sā wogōya bun dilelen.

⁷ Idi lo tai fiya tamo wōya orodif, anī ere, idi ereb wogō def ado, ereb nigin totol dinof are idi keleī sā.

⁸ Ada keleī, taka ī lo dōf el fouf are, lo ī biya.

⁹ Ada keleī, lo ī madur tamo nigin to inof, ī lo wal fiya, idodōya, Negur dudum fiya, mosor temeleid, idi fateul sā, idi buru naumeī nigin kisi

difedig, idi sineid temeid tar didenkesif, tamo yukesiya,

¹⁰ noliya, tamo tutur kayau tutur noliya, ferfer inouf nigin tamo bē yaleya, idegēya, momoi nē od wa fiya, ereb ganan ifelnēya biya wal difef anidi nigin lo inof.

¹¹ Ifelnēya biya anī, biya od fula fiya medeīya, Negur el fiya barikā aya wogōya nigin ifanan anī susu felef.

Odug Nē Wau Ifenēya Pol Bun Ilen

¹² Aya neda Odug Kristus Jesus megeir ifanan anī de afiyek, ere nigin, ī aya yogon od dō fiya biya anī ile fen, in kabī alouf nigin igirnan.

¹³ Aya kulu kono fiya tamo, tadū fediya tamo, seye tamo, anī ere, aya wau yūya ifanan, ere nigin, aya to kelei ken, momooya sa ken, age afen.

¹⁴ Neda Odug nē wau ifenēya, Kristus Jesus nē momooya wau laa fiya ado, mugi bagai aya bun foulal felen.

¹⁵ Od enei momoi bagai, ganan dale fen, momoi douf nigin: Kristus Jesus mosor tamo kel gei fiya nigin tenebur isin. Idi atun aya sane bagai, idi ganan wal fediya.

¹⁶ Anī ere, gariya eig fiya nigin, aya wau yūya ifanan, are aya mosor temeleid ganan wal fediya bun, Kristus Jesus in imatēya mugi bagai aya bun ifelnēdin, anī bunem idi momoi douf anidim dile fen, ī nigin momoi de fen, mata ibodkeleya anī dalouf nigin ī age fen.

¹⁷ Gama King ibodkeleya, ī mata ibodkeleya, ileya kisi feleya sā, Negur yogo dogol anī bun

yana ado fula fiya medeīya gai gai ibodkalauf. Momoi.

¹⁸ Timoti, neu kesu, aya tai fiya od eig fiya afonok, are õ nigin profet od wogōya yenē anī dō wo di, õ sā biya kusī wouf nigin.

¹⁹ Momoiya ado wau karētut biya urou kafī wol. Tunī anī ditoraran nigin dogo neid momoiya tadū difelen.

²⁰ Age difen atun are Himeneus Aleksanda ado, idi Negur to kono difiyēf anī keleī youf nigin, Satan ima bun anenēdin.

2

Negur Yana Yaleseyə Nigin Fadedya

¹ Aya õ totol bagai orokonok, uruwa bagai, are nonī fiya, kosēya, taka nigin Negur irokenēya, de fiyēya anī, tamo ganan nigin agouf.

² King ado kabī nē mudur ganan nigin agouf, are ada wauda inosiya ado foro tausil, Negur orof ganan ado fateul bun tabodōf nigin agouf.

³ Agouf are biya, Negur neda Isennadaya wau al fef,

⁴ Negur ī tamo adok ganan kel gei fouf nigin ado, momoi nē keleī bun disiyouf nigin orof.

⁵ Are, Negur ī tekelei, agef fen, atun tamo tekelei, Negur ado tamo atun ifaref, tamo are Kristus Jesus,

⁶ tamo ganan fotokar ī yogo bouwa itoron, anī yogon sain bun bagai Negurem tenebur tamo kayau keleī youf nigin yaoren.

⁷ Age fiya nigin, aya arū tamo, aposel igirnan, aya momoi bagai orok, aya idegēya sā, aya,

haiden atun, momoya bagai nē ifelnēdiya tamo igirnan.

⁸ Tamo fō fō ganan imeid fateul ilun dales fen, kosē douf anī aya orouf, seye sā, monē sā.

⁹ Takag, aya kayau kolos biya, taka mama ifenēya nē ani sā, tamo kayau nē lo fiya biya bun ifonūya anī orouf, fatiya kori fiya sā, gol sā, maaī tuwa meli bagai pel nē kilelei sā, meein odug nē kolos sā anī orouf.

¹⁰ Anī ere, aya idi toboununā biya dō difouf anī orouf, are kayau Negur yana dalesef ya anī susu falauf.

¹¹ Kayau ī foro yel dē yesil fen, dō fouf anī bunem keleī yalouf.

¹² Aya kayaum tamo ifelnēya be, wal fiye ken, uyu iroukenēya nigin to yo auf, ī foro yalauf bagai.

¹³ Ere nigin, Adam ketem inon, agef fen, Eva inon.

¹⁴ Agef fen, Adam anī to idegnen, kayau anī idegnē di, mosor bun kubū yen.

¹⁵ Anī ere, kayau idi toku toboununā biya bun momoi douf, waud laa fouf, fateul dibodōf are, idi kesu gō fiya bun isennēya dalouf.

3

Uyu Iroudiya Ado Uyu Iroudiya Farumen Kabī Tamo

¹ Od enei are momoi bagai: Taka ī uyu irouya wō youf nigin wau irōf, ī kabī biya yaleya nigin orof.

² Uyu irouya, yana sane sā, ī kayau aiwauf, anī ere, ī kayau tekelei youf, ī molol tamo, yogo nigin

el fe kulatun fouf, ī karī difiyēf, tamo dor yalouf,
tai fiya kisi feleya,

³ aai to yōdig, to kusī youf, imatēya, monēya sā,
moni nigin wau laa fiya sā.

⁴ Ī kayau kesu el fe, lo fediyouf bagai. Age fe di,
in kesu el de dō de fen, karī difiyēf.

⁵ (Taka ī yogon kayau kesu lo feid fen, tutuk
fediya kisi feleya sāf are, naig fe fen, ī Negur nē
sios lo fouf?)

⁶ Ī gama bagai momoya tamo wō ye fen, to uyu
irouya ifarauf bagai, age fouf are, ī bilāya bunem
fasikor fele di, Negur Satan es fiyen gen, īg es fiyēf
be.

⁷ Ī serē temeleid buneg yana biya adouf bagai,
anī bunem, ī yana sane to yale fen, Satan nē kor
bun to ilauf.

⁸ Uyu iroudiya farumen kabī tamo anidi, areg
age fiya, tamo idi karī difiyēdidig, idi baleid to
kara urudig, aai fatuk to dōdig, idegēya bunem
safina to daledig.

⁹ Idi momoya nē keleī mugi, kisi karētut atata
feleya ado dirouwauf bagai.

¹⁰ Uruwa idi kisi difediyouf, age de fen, idi
bun od taka sāf are, utornēdig len, uyu irouya
farumen kabī tamo wō de fen, tamo kayau
disennēdiyouf.

¹¹ Naab tekelei anī bunem, nedī aiweid tar idig
karī difiyēdiyouf, idi dumēn od to wogō douf, anī
ere, idi molol fen, ereb ereb ganan kulatun fiya
kisi falauf.

¹² Uyu irouya farumen kabī tamo ī kayau ai-
wauf, anī ere, kayau tekelei fen, in kesu tar ado fō
ereb ereb ganan anī el fe, kulatun fediyouf bagai.

¹³ Idi kabī biya dalen, are yeneid biya bagai dalef, age de fen, idi Kristus Jesus bun momooya nigin kukīya sā wogō def.

¹⁴ Aya õ gein kaisā bagai isiya nigin wau yenek, anī ere, aya faded enei atotkonok, anī bunem,

¹⁵ aya foi auf are, tamo kayau Negur nē fō bun naig de age difouf are õ keleī youf, Negur nē fō anī mata ibodōya Negur nē sios, are momoi nē monog tor ado gariya.

¹⁶ Neda momooya nē waa anī odug, are taka nem wa fiya kisi feleya sā:

Ĩ bouwa ado wō yen,

Awa Uurem ĩ madur bagai anī yaoren,
age fe di, engelem dilen,

age de fen, teneub ganan bun ĩ nigin wogō de,
momoi de di,

fula fiya medeīya bun yalesnen.

4

Pol Timoti Faded Fiyen

¹ Awa Uur yaor bagai irok, dum bun tunī fau momooya ditor ken, idegēya uur ado ereb ereb kaa sesen idim difelnēdiyouf anī, idi dō difouf.

² Ifelnēdiya age fediya are, idegēya tamo neid meleid yaleya bunem isif, idi neid kisi ain uruwam ifalege di, galig leya gen.

³ Idi tamo kayau yaleya katū difiyeīd fen, saaf tunī nigineg katū difiyēdiyouf, saaf are Negurem tamo momoi de fen, momoi nigin keleī anidi Negur de difiye ken, dāf nigin inodin.

⁴ Ereb ereb ganan Negur inon are biya, ereb ereb Negur de fiye ken, yaleyauf anī, to sese fiyēyauf,

⁵ ere nigin, are Negur nē od ado kosē bunem fateul ifenek.

⁶ Ereb ereb enei turā tar bun ufelnēdiyouf are, momoya od ado ifelnēya biya dō wodig anim megeir ifonō di, Kristus Jesus nē kabī tamo biya wō wouf.

⁷ Negur ditoron anī nē od ado kayau tubau neid nenerī ege anī to urou, Negur nē tobounā dō fiya biya wō wouf nigin, õ ogo tai wouf.

⁸ Bouwa buru nē tai fiya are naal isennadaf, anī ere, Negur nē tobounā dō fiya biya are ereb ereb ganan nigin isennadaf, anim gama mata ibodōya nē ado dumen mata ibodōya nē promis od irouf.

⁹ Od enei momoi bagai, ganan dale fen, momoi douf nigin

¹⁰ (enei nigin, ada kabī tale fen, lakī tafef), are ada neda wauda iseya mata ibodōya Negur bun tanon, ī tamo ganan nē isennēya, idi momoi def anidi neid bagai.

¹¹ Ereb ereb eneidi urokeneid, su agog wiyeid fen, ufelneid.

¹² Õ kesu oosi de fen, takam to lai yōi, anī ere, wogōya bun, ibodōya bun, wau laa fiya bun, momoya bun, amuyē sā karētut bun, momoya tamo neid suma ago fen, idi age de dō difouf nigin ufelnēdiyouf.

¹³ Atun meleid bun Negur nē Itotoya uwesauf, faded wediyouf, ago fen, ufelnēdif ule mog, aya asiyouf.

¹⁴ Uyu irouuya imeid õ teten dino fen, profet od bunem uur nẽ ege luwa walen anĩ to welebi wo.

¹⁵ Õ suma enei ganan dõ fen, waũ adok wenëdiyouf, anĩ bunem, tamo kayau ganan ogon kabĩ naig fe ilef anĩ dilouf.

¹⁶ Õ ogo nigin ado ogon ifelnëdiya nigin lo walauf. Anĩ feseya sã toku agouf, anĩ bunem, õ ogo ado idi karĩ diyõf anidi isennëya walogouf.

5

Momoiya Tamo Kayau Kulatun Fediya Nigin

¹ Tamo tubau totol bagai to kãkã wiyëf, anĩ ere, õ tamã gen urokenëf. Kesu oosi, turã tar gen walediyouf,

² kayau biyeid are sinã gen, kayau momoul are main tar gen, kisi karë bagai ado walediyouf.

³ Kayau waab bagai kesu sã anidi el ge lo wedigouf.

⁴ Anĩ ere, waab taka ĩ gere tar be, tubu tar adouf are, uruwa idi neid Negur dõ fiya nẽ tobonunã biya tai fiya nigin, idi neid ibor el de kulatun difouf, nedî sineid temeid tar simõ bun lo difedin anĩ kilei abag age de kulatun difediyouf, anim Negur wau al fouf.

⁵ Kayau waab bagai taka, ĩ mugu bagai, isennëya yaleya nigin yogen wau iseya Negur bun ino fen, bõ ado gaa ado toku kosë ye fen, Negur bun isennëya yaleya nigin to fiyëf.

⁶ Anĩ ere, waab taka ĩ bouwa sigigi fiya nigin dogol ibodõf are, ĩ mata ibodok, anĩ ere, ĩ laa fen.

⁷ Faded eneig tamo kayau wenëdiyouf, ago di, taka bouwa bun od to dinouf.

⁸ Taka ī yogon ibor tar to kulatun fediyouf, yogon sina tama kayau kesu bagai anī to kulatun fediyouf are, in wau momoiya wafef, anī bunem, ī sane bagai, taka to momoi yef anī wal fiya.

⁹ Waab taka ī aiwa tekelei ado el de dibodok dile 60 yar wal fen ouf are, waab neid daū bun unenēf,

¹⁰ agef fen, ī yogo toboununā biya nigin yana ado, ī kesu kulat biya, ī tamō yaledig, momoiya tamō kayau yeid kulo fedig, morō adodo isenneid fen, ī yogo ereb ereb biya ganan age fedig.

¹¹ Kayau waab fau gaū idi, waab neid daū bun to unouf. Ere nigin, idi neid bouwa nē oroya anī, Kristus nigin momoiya anī wal fese di, idi tamō yaleya nigin orodiyouf.

¹² Anī bunem, idi es fiya dogo bouweid bun dinof, ere nigin, idi uruwa bun waud kuturol fen iron anī narī difen.

¹³ Takag, idi fō fiya tobounueid ado fen, fō dalef diyōdig. Fō fiya dogol sā, dumēn od wogōya ado, taka nigin wogō yef iyōya, idim to wogōya nē anī wogō dedig.

¹⁴ Anī nigin, kayau waab fau gaū, tamō dalouf, kesu adouf, nedī fō el de lo difouf, kiwaim idi dumedin irōya nigin naab to dukenēdiyouf anī aya orouf.

¹⁵ Tunī mogo ditor ken, Satan dō difen.

¹⁶ Kayau taka ī momoiya ado, in ibor bun waab adodiyouf are, ī yogo isennēdiyouf, idi nigin sios morō to ifenēf, anī bunem, sios waab idi isennēdiya nigin bagai yenek anidi isennēdiyouf.

¹⁷ Uyu irouya sios nē kabī el de diroulef, yana biya ado mala solo biya bagai dalouf, are idi biya

od wogō def ado difelnēdif anidi, age difouf bagai.

¹⁸ Negur nē Itotoya eig ye irok, “Bulmakau wit faat biya nē gabar yalelauf nigin lalai feid mog, yogon awa to ufokol,”* takag, “Kabī tamo, yogon kabī mala yalouf.”†

¹⁹ Uyu irouya taka nigin bouwa yūya od to urouwauf, fau uruwom be towom dirō di, anī urouwauf.

²⁰ Idi mosor dinof are tamo kayau meleid bun ou wiyēdiyouf, are tunī wedereid fokō youf nigin agouf.

²¹ Negur, Kristus Jesus ado, engel igirnēdin meleid bun, aya õ totol bagai orokonok, faded enei dō fen, taka dogol waū to wenēf, õ anī kinau ya anī bunem ereb taka to agouf.

²² Tetedin imā inoya nigin to sibu wo, tunī neid mosor bun to kababal wo. Õ karē bagai ubodōf.

²³ Naan dogol to wāf, wain naal bagai walouf, ere nigin, ogon name darau nigin ado, ogon dagi baba baban wō yedig nigin.

²⁴ Tamo tunī neid mosor are yaor, anī ketem es fiya bun ifaref, anī ere, tunī neid mosor dum yaorouf.

²⁵ Age fiya gen bagai, biya age fiya are yaor, idi biya age fiya gama yaor sā areg, iminēya kisi feleya sā.

6

¹ Ferfer idi ganan, nedī moroid tar yana biya dino fen, karī difiyēdiyouf, anī bunem, Negur nē yana ado ama mafelnēdif anī, to kono difouf.

* **5:18:** Diuteronomi 25:4 † **5:18:** Luk 10:7

² Tunī idi, nedī moroid tar momoiya adouf are, amā tura tura de fen, to karī difiyēdig gen to age difouf. Age fiya ban, idi el de aruneid dalouf, ere nigin, idi neid kabī bunem biya dalef are momoiya tamō, idi neid oboiyeid. Enei ganan anī ufelneid fen, totol bagai urokenēdiyouf.

Moni Nigin Wau Laa Fiya

³ Taka ī idegēya keleī ifelneid fen, Odug Jesus Kristus nē faded fiya biya ado fateul ibodōya ifelnēdiya anī nigin wau to irōf are,

⁴ ī idegēyam idegnē di, bilā yef, ī ereb taka to keleī. ī monēya ado od luwa irouya nigin oroya sane ado, anī bunem, kiyeī, kusī, bou yūya od, sisiniya kisi sane irou fen,

⁵ tamō kisi sesen ado atun toku koūkā ya ibodōf, tamō kisi sesen ado anidi, momoi anī ditor ken, fateul ibodōya are moni odug yaleya nigin de fen, kisi difedig.

⁶ Anī ere, safina nigin wau morō sā ado fateul ibodōya anī, mala biya ado.

⁷ Ere nigin, ada teneub enei bun gemū tasin nigin, age fiya bagai gemū ke tauf.

⁸ Anī ere, ada saaf ado kolos adouf are, ada nigin de tauf.

⁹ Tamō kayau safineid ado ibodōya kisi difef anidi, kisi fiya bun, kor bun ado, neneya kisi ado waila dī fiya kisi musei bun kuku def, kisi anim tamō daūf sane lauf.

¹⁰ Moni nigin wau laa fiya, are ereb ereb sesen ganan nē gariya. Tamō kayau tunī moni nigin waud ditenen, momoiya ditor ken, idi dogo waud darau musei dalen.

Polem Timoti Ago Dō Woi Fiyen

11 Anī ere, õ, Negur nē tamo, enei ganan nigin so rel fen, madur bagai ibodōya, fateul ibodōya, momoiya, wau laa fiya, feseya sā ifareya ado, molol dō wouf.

12 Momoya nigin kusī biya walouf. Mata ibodkeleya are, õ musei meleid bun el wo, kurō wesin sain bun, õ anī nigin iweignon anī urou kafī wol.

13 Negur ereb ereb ganan mata ifenēdidig ado, Kristus Jesus ī Pontius Pailat mala bun el fe kurō fesin, idi meleid bun, aya õ orokonok,

14 od enei dō, kerema sā dō wo ule, neda Odug Jesus Kristus wō youf,

15 are Negur yagon sain bun irou isiyouf, Negur ī el fiya ado ī dogol Uyu Irouya, king neid King ado odudug neid Odug,

16 ī dogol ī mata ibodkeleya, agef fen, ī lalan medeīya barikā tamom an ileya nigin kisi feleya sā anī bun ibodōdig, taka nem to ilen, taka nemeg to ilouf. ī bun yana ado megeir faimud ibodkalauf. Momoi.

17 Teneub enei bun safina musei adodo urokenēdig len, yeneid to dales fen, moni nigin waud to diten, moni are gai to ibodkalauf, anī ere, idi neid waud Negur bun dinouf, ī ada wauda al fouf nigin, ereb ereb ganan kisi feleya ifanadadig.

18 Idi toboununā biya age dife di, toboununā biya inid ado dibodōf nigin, dor yaleya nigin ado, ne tā isennēya nigin urokenēdiyouf.

19 Naab enei bunem, idi safina biya dogo neid dumen nē nigin gariya megeir ado dino fen,

mudu dino di, iselauf, age de fen, idi mata are mata bagai anĩ dalouf.

²⁰ Timoti, ereb ereb õ bun inon anĩ kulatun wo. Momoya sã neid od ado, kiwai kisi are idegëya bunem keleĩ biya dedig anĩ so wiye,

²¹ are tunĩ mogo wogõ den, anĩ age de fen, idi momoya bun tamal ditor diyalelen.

Wau ifenëya õ bun ibodõf.

**Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files
dated 31 Aug 2023

d7099f9d-3bdf-5620-8eb3-7e6c51cab7ea